

I. DISPOSICIÓN XERAIS

MINISTERIO DE INDUSTRIA, TURISMO E COMERCIO

16174 *Real decreto 1388/2011, do 14 de outubro, polo que se ditan as disposicións de aplicación da Directiva 2010/35/UE do Parlamento Europeo e do Consello, do 16 de xuño de 2010, sobre equipamentos de presión transportables e pola que se derrogan as directivas 76/767/CEE, 84/525/CEE, 84/526/CEE, 84/527/CEE e 1999/36/CE.*

O Real decreto 222/2001, do 2 de marzo, polo que se ditan as disposicións de aplicación da Directiva 1999/36/CE do Consello, do 29 de abril, relativa a equipamentos de presión transportables, traspuxo ao ordenamento xurídico español a citada directiva, introducindo unha maior exixencia de seguridade, coa finalidade de facilitar a utilización deses equipamentos nos territorios doutros Estados membros dentro dunha operación de transporte.

Máis tarde, o Consello da Unión Europea aprobou a Directiva 2010/35/UE, do 16 de xuño de 2010, sobre equipamentos de presión transportables e pola que se derrogan as directivas 76/767/CEE, 84/525/CEE, 84/526/CEE, 84/527/CEE e 1999/36/CE, do Consello.

Esta directiva ten en consideración a evolución habida na seguridade do transporte, así como o contido da Directiva 2008/68/CE do Parlamento Europeo e do Consello, do 24 de setembro de 2008, sobre o transporte terrestre de mercadorías perigosas, a cal vén ampliar o ámbito de aplicación das disposicións de determinados acordos internacionais de maneira que se apliquen ao tráfico nacional, co fin de harmonizar en toda a Unión Europea as condicións en que se transportan as mercadorías perigosas por estrada, ferrocarril e vías navegables interiores. A Directiva 2008/68/CE non se incorporou aínda á lexislación nacional. Porén, os seus anexos si que forman parte da normativa aplicable no territorio nacional, posto que reproducen as previsións do Acordo europeo sobre o transporte internacional de mercadorías perigosas por estrada (ADR), celebrado en Xenebra o 30 de setembro de 1957, na súa versión emendada, e do regulamento relativo ao transporte internacional por ferrocarril de mercadorías perigosas (RID), que figura no apéndice C do Convenio relativo aos transportes internacionais por ferrocarril (COTIF), asinado en Berna o 9 de maio de 1980 e modificado polo protocolo feito en Vilnius o 3 de xuño de 1999, que forman parte do ordenamento xurídico español con independencia da directiva porque España é parte do ADR e atópase vinculada polo RID.

A Directiva 2010/35/UE ten como fin evitar conflitos de normas, en particular polo que se refire aos requisitos da conformidade, á avaliación da conformidade e aos procedementos de avaliación da conformidade, aplicables aos equipamentos de presión transportables.

En cumprimento das obrigas derivadas do indicado no artigo 42 da Directiva 2010/35/UE, do 16 de xuño, cómpre ditan as disposicións nacionais que prevexan e adopten as previsións contidas na mencionada directiva, como máis tarde o 30 de xuño de 2011. Esta norma constitúe, ademais, un desenvolvemento do previsto no capítulo I do título III da Lei 21/1992, do 16 de xullo, de industria, relativo á seguridade industrial.

De acordo co disposto no artigo 24.1.e) da Lei 50/1997, do 27 de novembro, do Goberno, esta disposición foi sometida ao trámite de audiencia que nela se establece, e remitiuse aos sectores afectados. Así mesmo, foron consultados os órganos competentes das comunidades autónomas.

O texto da disposición conta cos informes favorables da Comisión de Coordinación de Transportes de Mercadorías Perigosas e do Consello de Coordinación da Seguridade Industrial. Así mesmo, foi sometido a informe dos ministerios de Fomento e Defensa.

Na súa virtude, por proposta do ministro de Industria, Turismo e Comercio, de acordo co Consello de Estado e logo de deliberación do Consello de Ministros na súa reunión do día 14 de outubro de 2011,

DISPOÑO:

CAPÍTULO I

Ámbito de aplicación e definicións

Artigo 1. *Obxecto e ámbito de aplicación.*

1. Constitúe o obxecto deste real decreto o establecemento de normas de desenvolvemento da normativa internacional en relación coas obrigas dos operadores e os requisitos que deben cumprir os equipamentos de presión transportables, co fin de reforzar a seguridade e de garantir a libre circulación deste tipo de equipamentos na Unión Europea.

2. Este real decreto aplicarase:

a) Aos equipamentos de presión transportables novos, tal como se definen no artigo 2, número 1, que non leven a marcación de conformidade prevista no Real decreto 222/2001, do 2 de marzo, polo que se ditan as disposicións de aplicación da Directiva 1999/36/CE do Consello, do 29 de abril, relativa a equipamentos de presión transportables, no que respecta á súa comercialización;

b) Aos equipamentos de presión transportables, tal como se definen no artigo 2, número 1, que leven a marcación de conformidade prevista neste real decreto ou no Real decreto 222/2001, do 2 de marzo, no que respecta aos controis periódicos, aos controis intermedios, aos controis extraordinarios e á súa utilización;

c) Aos equipamentos de presión transportables, tal como se definen no artigo 2, número 1, que non leven a marcación de conformidade prevista no Real decreto 222/2001, do 2 de marzo, no que respecta á reavaliación da conformidade.

3. Este real decreto non se aplicará:

a) Aos equipamentos de presión transportables introducidos no mercado antes da data de aplicación do Real decreto 222/2001, do 2 de marzo, e que non fosen sometidos a unha reavaliación da conformidade.

b) Aos equipamentos de presión transportables exclusivamente utilizados para as operacións de transporte de mercadorías perigosas entre os Estados membros e países terceiros, efectuadas de conformidade co establecido no Acordo Europeo sobre o Transporte Internacional de Mercadorías Perigosas por Estrada (en diante, ADR), celebrado en Xenebra o 30 de setembro de 1957, na súa versión emendada, e co Regulamento relativo ao transporte internacional por ferrocarril de mercadorías perigosas (en diante, RID), que figura no apéndice C do Convenio relativo aos transportes internacionais por ferrocarril (en diante, COTIF), asinado en Berna o 9 de maio de 1980 e modificado polo Protocolo feito en Vilnius o 3 de xuño de 1999, salvo que se estipule o contrario.

Artigo 2. *Definicións.*

Para os efectos deste real decreto, entenderase por:

1. Equipamentos de presión transportables:

a) Todos os recipientes de presión, así como, de ser o caso, as súas válvulas e demais accesorios, tal como se inclúen no capítulo 6.2 do RID e ADR;

b) As cisternas, os vehículos/vagóns en batería, os contedores de gas de elementos múltiples (CGEM), así como, de ser o caso, as súas válvulas e demais accesorios, tal como se inclúen no capítulo 6.8 do RID e ADR, cando os equipamentos mencionados nas letras a) ou b) se utilicen de conformidade co RID ou ADR para o transporte de gases da clase 2, excluíndo os gases ou os artigos coas cifras 6 e 7 no código de clasificación, e para o transporte de substancias perigosas doutras clases, indicadas no anexo I deste real decreto.

Entenderase que entre os equipamentos de presión transportables quedan incluídos os cartuchos de gas (número ONU 2037) e excluídos os aerosois (número ONU 1950), os recipientes crioxénicos abertos, as botellas de gas para aparellos respiratorios, os extintores de incendios (número ONU 1044), os equipamentos de presión transportables exentos conforme o punto 1.1.3.2 do RID e ADR e os equipamentos de presión transportables exentos dos requisitos en materia de construción e ensaio de embalaxes conforme as disposicións especiais do punto 3.3 do RID e ADR;

2. Introducción no mercado: primeira comercialización dun equipamento de presión transportable no mercado nacional ou da Unión Europea;

3. Comercialización: toda subministración, remunerada ou gratuíta, dun equipamento de presión transportable para a súa distribución ou utilización no mercado nacional ou da Unión Europea no transcurso dunha actividade comercial ou servizo público;

4. Utilización: enchedura, almacenamento temporal relacionado co transporte, baleirado e reenchedura de equipamentos de presión transportables;

5. Retirada: calquera medida destinada a impedir a comercialización ou a utilización dun equipamento de presión transportable;

6. Recuperación: calquera medida destinada a obter a devolución dun equipamento de presión transportable xa posto á disposición do usuario final;

7. Fabricante: toda persoa física ou xurídica que fabrica un equipamento de presión transportable, ou partes del, ou que manda deseñar ou fabricar un equipamento deste tipo e o comercializa co seu nome ou marca comercial;

8. Representante autorizado: toda persoa física ou xurídica establecida no territorio nacional ou na Unión Europea que recibiu un mandato por escrito dun fabricante para actuar no seu nome en tarefas específicas;

9. Importador: toda persoa física ou xurídica establecida no territorio nacional ou na Unión Europea que introduce no mercado nacional ou da Unión Europea un equipamento de presión transportable, ou partes del, procedente dun país terceiro;

10. Distribuidor: toda persoa física ou xurídica establecida no territorio nacional ou na Unión Europea, distinta do fabricante ou do importador, que comercializa un equipamento de presión transportable, ou partes del;

11. Propietario: toda persoa física ou xurídica establecida no territorio nacional ou na Unión Europea que é titular da propiedade dun equipamento de presión transportable;

12. Usuario: toda persoa física ou xurídica establecida no territorio nacional ou na Unión Europea que utiliza un equipamento de presión transportable;

13. Axentes económicos: o fabricante, o representante autorizado, o importador, o distribuidor, o propietario ou o usuario que interveñen no transcurso dunha actividade comercial ou de servizo público, a título oneroso ou gratuíto;

14. Avaliación da conformidade: avaliación e procedemento de avaliación da conformidade establecidos no RID e ADR;

15. Marcación Π: marcación que indica que o equipamento de presión transportable cumpre os requisitos aplicables de avaliación da conformidade establecidos no RID e ADR e neste real decreto;

16. Reavaliación da conformidade: procedemento encamiñado a avaliar a posteriori, por petición do propietario ou do usuario, a conformidade dos equipamentos de presión transportables fabricados e introducidos no mercado antes da data de aplicación do Real decreto 222/2001, do 2 de marzo;

17. Controis periódicos: controis periódicos e procedementos que rexen este tipo de controis, de conformidade co establecido no RID e ADR;

18. Controis intermedios: controis intermedios e procedementos que rexen este tipo de controis, de conformidade co establecido no RID e ADR;

19. Controis extraordinarios: controis extraordinarios e procedementos que rexen este tipo de controis, de conformidade co establecido no RID e ADR;

20. Acreditación: declaración por un organismo nacional de acreditación de que un organismo de control cumpre os requisitos fixados no segundo número do punto 1.8.6.8 do RID e ADR;

21. Autoridade notificante: autoridade designada por un Estado membro, responsable de establecer e aplicar os procedementos necesarios para a avaliación, notificación e supervisión posterior dos organismos notificados;

22. Organismo notificado: organismo de control que cumpre os requisitos establecidos no RID e ADR e as condicións enunciadas nos artigos 18 e 23 deste real decreto e notificado de conformidade co artigo 20 deste real decreto;

23. Notificación: proceso polo que se outorga a condición de organismo notificado a un organismo de control e que inclúe a comunicación desta información á Comisión Europea, no sucesivo Comisión, e aos Estados membros;

24. Vixilancia do mercado: actividades levadas a cabo e medidas tomadas polas autoridades públicas para velar por que os equipamentos de presión transportables cumpran durante o seu ciclo de vida os requisitos establecidos no RID e ADR e neste real decreto e non entrañen un risco para a saúde e a seguridade ou noutros aspectos relacionados coa protección do interese público.

Artigo 3. *Requisitos adicionais.*

Os órganos competentes en materia de seguridade industrial das comunidades autónomas poderán establecer no ámbito do seu territorio requisitos adicionais para o almacenamento a medio ou longo prazo ou para a utilización *in situ* de equipamentos de presión transportables. Estes requisitos deberán ser publicados no Boletín Oficial da Comunidade Autónoma. Non obstante, as comunidades autónomas non poderán establecer requisitos adicionais para os equipamentos de presión transportables propiamente ditos.

CAPÍTULO II

Obrigas dos axentes económicos

Artigo 4. *Obrigas dos fabricantes.*

1. Cando introduzan os seus equipamentos de presión transportables no mercado, os fabricantes aseguraranse de que eses equipamentos se deseñaron, fabricaron e documentaron de conformidade cos requisitos establecidos no RID e ADR e neste real decreto.

2. Cando se acredítase mediante o proceso de avaliación da conformidade previsto no RID e ADR e neste real decreto que os equipamentos de presión transportables cumpren os requisitos aplicables, os fabricantes colocarán a marcación Π de conformidade co artigo 14 deste real decreto.

3. Os fabricantes conservarán a documentación técnica que se especifica no RID e ADR. Esta documentación conservarase durante o período previsto neles.

4. Os fabricantes que consideren ou teñan motivos para crer que un equipamento de presión transportable que introduciron no mercado non é conforme co RID e ADR ou con este real decreto adoptarán inmediatamente as medidas correctoras necesarias para facelo conforme, retiralo ou recuperalo, se procede. Ademais, cando o equipamento de presión transportable presente un risco, os fabricantes informarán inmediatamente diso o órgano competente en materia de seguridade industrial da comunidade autónoma onde o fabricante teña o seu domicilio social. Este órgano remitirá a información recibida ao Ministerio de Industria, Turismo e Comercio nun prazo non superior a tres meses, o cal a

transmitirá ás autoridades nacionais competentes dos Estados membros en que comercializaron o equipamento de presión transportable. Así mesmo, as comunidades autónomas darán tamén detalles, en particular, sobre a non conformidade e as medidas correctoras adoptadas ao Ministerio de Industria, Turismo e Comercio.

5. Os fabricantes documentarán todos estes casos de non conformidade e as medidas correctoras.

6. Sobre a base dunha solicitude motivada do órgano competente en materia de seguridade industrial dunha comunidade autónoma, os fabricantes facilitaranlle toda a información e documentación necesaria para demostrar a conformidade do equipamento de presión transportable, nunha linguaxe que poida comprender facilmente este órgano. Cooperarán con este órgano, tras a súa petición, en calquera acción destinada a eliminar os riscos que entrañen os equipamentos de presión transportables que introduciron no mercado.

7. Os fabricantes unicamente facilitarán aos usuarios información que se axuste aos requisitos establecidos no RID e ADR e neste real decreto.

Artigo 5. *Representantes autorizados.*

1. Os fabricantes poderán designar, mediante mandato escrito, un representante autorizado.

As obrigas establecidas no artigo 4, números 1 e 2, e a elaboración da documentación técnica non formarán parte do mandato do representante autorizado.

2. O representante autorizado efectuará as tarefas especificadas no mandato recibido do fabricante. O mandato deberá permitir ao representante autorizado realizar como mínimo as tarefas seguintes:

a) Conservar a documentación técnica á disposición das autoridades de vixilancia das comunidades autónomas durante, polo menos, o período establecido no RID e ADR para os fabricantes;

b) Sobre a base dunha solicitude motivada dun órgano competente en materia de seguridade industrial dunha comunidade autónoma, facilitar a ese órgano toda a información e documentación necesaria para demostrar a conformidade do equipamento de presión transportable, nun idioma que poida comprender facilmente ese órgano;

c) Cooperar cos órganos competentes en materia de seguridade industrial das comunidades autónomas, por petición destes, en calquera acción destinada a eliminar os riscos que entrañen os equipamentos de presión transportables obxecto do seu mandato.

3. A identidade e o enderezo do representante autorizado indicaranse no certificado de conformidade especificado no RID e ADR.

4. Os representantes autorizados unicamente facilitarán aos usuarios información que se axuste aos requisitos establecidos no RID e ADR e neste real decreto.

Artigo 6. *Obrigas dos importadores.*

1. Os importadores só introducirán no mercado do territorio nacional equipamentos de presión transportables que sexan conformes co RID e ADR e con este real decreto.

2. Antes de introducir no mercado un equipamento de presión transportable, os importadores aseguraranse de que o fabricante levou a cabo a debida avaliación de conformidade. Aseguraranse de que o fabricante elaborou a documentación técnica e de que o equipamento de presión transportable leva a marcación Π e vai acompañado do certificado de conformidade que se especifica no RID e ADR.

Se o importador considera ou ten motivos para crer que un equipamento de presión transportable non é conforme co RID e ADR ou con este real decreto, non o poderá introducir no mercado ata que sexa conforme. Ademais, cando o equipamento de presión transportable presente un risco, o importador informará diso o fabricante e os órganos competentes da súa comunidade autónoma en materia de industria.

3. Os importadores indicarán o seu nome e o seu enderezo de contacto no certificado de conformidade que se especifica no RID e ADR ou xuntaránlle esta información.

4. Mentres sexan responsables dun equipamento de presión transportable, os importadores aseguraranse de que as condicións de almacenamento ou transporte non comprometen o cumprimento dos requisitos establecidos no RID e ADR.

5. Os importadores que consideren ou teñan motivos para crer que un equipamento de presión transportable que introduciron no mercado nacional non é conforme co RID e ADR ou con este real decreto adoptarán inmediatamente as medidas correctoras necesarias para facelo conforme, retíralo ou recupéralo, se procede. Ademais, cando o equipamento de presión transportable presente un risco, os importadores informarán inmediatamente diso o fabricante e o órgano competente en materia de seguridade industrial da comunidade autónoma onde o importador teña o seu domicilio social e darán detalles, en particular, sobre a non conformidade e as medidas correctoras adoptadas. O citado órgano remitirá a información recibida ao Ministerio de Industria, Turismo e Comercio nun prazo non superior a tres meses.

Os importadores documentarán todos estes casos de non conformidade e as medidas correctoras.

6. Durante polo menos o período establecido no RID e ADR para os fabricantes, os importadores conservarán unha copia da documentación técnica á disposición dos órganos competentes da súa comunidade autónoma en materia de industria e aseguraranse de que, logo de petición, estas autoridades reciban unha copia.

7. Sobre a base dunha solicitude motivada do órgano competente en materia de seguridade industrial dunha comunidade autónoma, os importadores facilitaránlle toda a información e documentación necesarias para demostrar a conformidade do equipamento de presión transportable, nunha linguaxe que poida comprender facilmente o dito órgano. Cooperarán con este órgano, por petición del, en calquera acción destinada a eliminar os riscos que entrañen os equipamentos de presión transportables que introduciron no mercado.

8. Os importadores unicamente facilitarán aos usuarios información que se axuste a os requisitos establecidos no RID e ADR e neste real decreto.

Artigo 7. *Obrigas dos distribuidores.*

1. Os distribuidores soamente comercializarán no mercado do territorio nacional equipamentos de presión transportables que sexan conformes co RID e ADR e con este real decreto. Antes de comercializar un equipamento de presión transportable, os distribuidores comprobarán que leve a marcación Π e que vaia acompañado do certificado de conformidade e do enderezo de contacto mencionada no artigo 6, número 3 deste real decreto.

Se un distribuidor considera ou ten motivos para crer que un equipamento de presión transportable non é conforme co RID e ADR ou con este real decreto, só poderá proceder á súa comercialización tras facelo conforme. Ademais, cando o equipamento de presión transportable presente un risco, o distribuidor informará diso o fabricante ou o importador, así como os órganos competentes da súa comunidade autónoma en materia de industria.

2. Mentres sexan responsables dun equipamento de presión transportable, os distribuidores aseguraranse de que as condicións de almacenamento ou transporte non comprometen o cumprimento dos requisitos establecidos no RID e ADR.

3. Os distribuidores que consideren ou teñan motivos para crer que un equipamento de presión transportable que comercializaron non é conforme co RID e ADR ou con este real decreto, aseguraranse de que se adopten as medidas correctoras necesarias para o facer conforme, retíralo ou recupéralo, segundo proceda. Ademais, cando o equipamento de presión transportable presente un risco, os distribuidores informarán inmediatamente diso o fabricante, o importador, de ser o caso, e os órganos competentes en materia de seguridade industrial das comunidades autónomas en que comercializaron o equipamento de presión transportable e darán detalles, en particular, sobre a non conformidade e as

medidas correctoras adoptadas. Os citados órganos remitirán a información recibida ao Ministerio de Industria, Turismo e Comercio nun prazo non superior a tres meses.

Os distribuidores documentarán todos estes casos de non conformidade e as medidas correctoras.

4. Sobre a base dunha solicitude motivada do órgano competente en materia de seguridade industrial dunha comunidade autónoma, os distribuidores facilitaranlle toda a información e documentación necesaria para demostrar a conformidade do equipamento de presión transportable, nunha linguaxe que poida comprender facilmente ese órgano. Cooperarán con ese órgano, por petición súa, en calquera acción destinada a eliminar os riscos que entrañen os equipamentos de presión transportables que comercializaron.

5. Os distribuidores unicamente facilitarán aos usuarios información que se axuste aos requisitos establecidos no RID e ADR e neste real decreto.

Artigo 8. *Obrigas dos propietarios.*

1. Se un propietario considera ou ten motivos para crer que un equipamento de presión transportable non é conforme co RID e ADR, incluídos os requisitos relativos aos controis periódicos, ou con este real decreto, non o comercializará ou utilizará ata que sexa conforme. Ademais, cando o equipamento de presión transportable presente un risco, o propietario informará diso o fabricante ou o importador ou o distribuidor, así como o órgano competente da súa comunidade autónoma en materia de industria.

Os propietarios documentarán todos estes casos de non conformidade e as medidas correctoras.

2. Mentres sexan responsables dun equipamento de presión transportable, os propietarios aseguraranse de que as condicións de almacenamento ou transporte non comprometen o cumprimento dos requisitos establecidos no RID e ADR nin na ITC APQ-5 do Real decreto 379/2001, do 6 de abril, polo que se aproba o Regulamento de almacenamento de produtos químicos e as súas instrucións técnicas complementarias MIE-APQ-1, MIE-APQ-2, MIE-APQ-3, MIE-APQ-4, MIE-APQ-5, MIE-APQ-6 e MIE-APQ-7.

3. Os propietarios unicamente facilitarán información aos usuarios conforme os requisitos establecidos no RID e ADR e neste real decreto.

4. Este artigo non se aplicará aos particulares que se propoñan utilizar equipamentos de presión transportables para o seu uso persoal ou doméstico ou para as súas actividades deportivas ou de ocio.

Artigo 9. *Obrigas dos usuarios.*

1. Os usuarios soamente utilizarán equipamentos de presión transportables que sexan conformes cos requisitos establecidos no RID e ADR e neste real decreto.

2. Cando o equipamento de presión transportable presente un risco, o usuario informará diso o propietario e o órgano competente da súa comunidade autónoma en materia de industria.

Artigo 10. *Casos en que as obrigas dos fabricantes se aplican aos importadores e distribuidores.*

Para os efectos deste real decreto, considerarase fabricante e, por conseguinte, estará suxeito ás obrigas do fabricante conforme o disposto no artigo 4, o importador ou distribuidor que introduza no mercado un equipamento de presión transportable co seu nome ou marca comercial, ou que modifique un equipamento de presión transportable xa introducido no mercado de forma que se poida ver afectada a súa conformidade cos requisitos aplicables.

Artigo 11. *Identificación dos axentes económicos.*

Os axentes económicos identificarán, logo de solicitude do órgano competente da súa comunidade autónoma en materia de industria e durante un período de polo menos 10 anos:

- a) Calquera axente económico que lles subministrase un equipamento de presión transportable;
- b) Calquera axente económico a quen lle subministrasen un equipamento de presión transportable.

CAPÍTULO III

Conformidade dos equipamentos de presión transportables

Artigo 12. *Conformidade dos equipamentos de presión transportables e avaliación desta.*

1. Os equipamentos de presión transportables a que se refire o artigo 1, número 2, letra a) deberán cumprir os requisitos pertinentes, relativos á avaliación da conformidade e aos controis periódicos, intermedios e extraordinarios, establecidos no RID e ADR e nos capítulos III e IV deste real decreto.

2. Os equipamentos de presión transportables a que se refire o artigo 1, número 2, letra b) deberán cumprir as especificacións da documentación conforme a cal se fabricasen. Os equipamentos estarán suxeitos a controis periódicos, intermedios e extraordinarios conforme o RID e ADR e os requisitos dos capítulos III e IV deste real decreto.

3. Os certificados de avaliación da conformidade, os certificados de reavaliación da conformidade e os informes dos controis periódicos, intermedios e extraordinarios expedidos por un organismo notificado serán válidos en todo o territorio nacional e en todos os Estados membros.

Para as partes desmontables dos equipamentos de presión transportables recargables poderase efectuar unha avaliación da conformidade independente.

Artigo 13. *Principios xerais da marcación Π.*

1. A marcación Π será colocada unicamente polo fabricante ou, nos casos de reavaliación da conformidade, conforme o disposto no anexo II deste real decreto. En relación coas botellas de gas anteriormente conformes coa Orde do Ministerio de Industria e Enerxía do 3 de xullo de 1987, pola que se modifica a instrución técnica complementaria MIE-AP7 do Regulamento de aparellos de presión, referente a botellas e botellóns para gases comprimidos, licuados e disoltos de presión, a marcación Π será colocada polo organismo notificado ou baixo a súa supervisión.

2. A marcación Π colocarase exclusivamente nos equipamentos de presión transportables que:

- a) Cumpran os requisitos relativos á avaliación da conformidade establecidos no RID e ADR e neste real decreto, ou
- b) Cumpran os requisitos relativos á reavaliación da conformidade mencionados na disposición transitoria única.

Non se colocarán en ningún outro equipamento de presión transportable.

3. Coa colocación da marcación Π, o fabricante indica que asume a responsabilidade da conformidade do equipamento de presión transportable con todos os requisitos aplicables establecidos no RID e ADR e neste real decreto.

4. Para os efectos deste real decreto, a marcación Π será a única marcación que acredite a conformidade do equipamento de presión transportable cos requisitos aplicables establecidos no RID e ADR e neste real decreto.

5. Queda prohibido fixar nos equipamentos de presión transportables marcas, signos e inscricións que poidan inducir a terceiros a erro sobre o significado ou a forma da marcación Π.

Calquera outra marcación colocarase nos equipamentos de presión transportables de forma que non afecte a visibilidade, a lexibilidade e o significado da marcación Π.

6. As partes desmontables dos equipamentos de presión transportables recargables cunha función directa de seguridade levarán a marcación Π.

7. As comunidades autónomas aseguraranse da correcta aplicación do réxime que regula a marcación Π e emprenderán as accións oportunas en caso de uso incorrecto da marcación. As comunidades autónomas establecerán, así mesmo, as correspondentes sancións. Estas sancións deberán ser proporcionadas á gravidade da infracción e constituír un elemento eficaz de disuasión contra o uso incorrecto da marcación.

Artigo 14. *Regras e condicións para a colocación da marcación Π.*

1. A marcación Π consistirá no símbolo que se reproduce no modelo seguinte:

2. A altura mínima da marcación Π será de 5 mm. Para os equipamentos de presión transportables cun diámetro igual ou inferior a 140 mm a altura mínima será de 2,5 mm.

3. Respectaranse as proporcións do debuxo graduado do número 1 deste artigo. A reixa non forma parte da marcación.

4. A marcación Π colocarase no equipamento de presión transportable ou na súa placa de datos de maneira visible, lexible e indeleble, así como nas partes desmontables do equipamento de presión transportable recargable que cumpran unha función directa de seguridade.

5. A marcación Π colocarase antes de introducir no mercado un novo equipamento de presión transportable ou partes desmontables do equipamento de presión transportable recargable que cumpran unha función directa de seguridade.

6. A marcación Π irá seguida do número de identificación do organismo notificado que interveña nos controis e ensaios iniciais.

O número de identificación do organismo notificado colocarao o propio organismo ou, seguindo as súas instrucións, o fabricante.

7. A marcación da data do control periódico ou, cando proceda, do control intermedio deberá ir acompañada do número de identificación do organismo notificado responsable do control periódico.

8. En relación coas botellas de gas anteriormente conformes coa Orde do Ministerio de Industria e Enerxía do 3 de xullo de 1987, pola que se modifica a instrución técnica complementaria MIE-AP7 do Regulamento de aparellos de presión, referente a botellas e botellóns para gases comprimidos, licuados e disoltos de presión que non leven a marcación Π, con ocasión do primeiro control periódico realizado de conformidade con este real decreto o número de identificación do organismo notificado deberá ir precedido da marcación Π.

Artigo 15. *Libre circulación de equipamentos de presión transportables.*

Sen prexuízo dos procedementos de salvagarda previstos nos artigos 27 e 28 deste real decreto e do marco de vixilancia do mercado establecido no Regulamento (CE) n.º 765/2008 do Parlamento Europeo e do Consello, do 9 de xullo de 2008, polo que se establecen os requisitos de acreditación e vixilancia do mercado relativos á comercialización dos produtos e polo que se derroga o Regulamento (CEE) n.º 339/93, ningunha comunidade autónoma poderá prohibir, limitar ou impedir no seu territorio a libre circulación, a comercialización e a utilización dos equipamentos de presión transportables que cumpran o disposto neste real decreto.

CAPÍTULO IV

Autoridade notificante e organismos notificados

Artigo 16. *Autoridade notificante.*

A autoridade notificante, responsable de establecer e aplicar os procedementos necesarios para a avaliación, notificación e supervisión posterior dos organismos notificados é o Ministerio de Industria, Turismo e Comercio.

Artigo 17. *Obriga de información das autoridades notificantes.*

O Ministerio de Industria, Turismo e Comercio informará a Comisión dos procedementos de avaliación, notificación e supervisión dos organismos notificados, así como de calquera cambio na información transmitida.

Artigo 18. *Requisitos relativos aos organismos notificados.*

1. Os organismos notificados españois encargados de efectuar os procedementos de certificación recollidos neste real decreto deberán ter a condición de organismo de control a que se refire o capítulo I, título III da Lei 21/1992, do 16 de xullo, de industria, desenvolto no capítulo IV do Regulamento da infraestrutura para a calidade e a seguridade industrial, aprobado polo Real decreto 2200/1995, do 28 de decembro.

2. Toda autoridade competente no sentido do RID e ADR poderá ser organismo notificado a condición de que cumpra os requisitos establecidos no RID e ADR e neste real decreto, e de que non actúe tamén como autoridade notificante.

3. Os organismos notificados estableceranse de conformidade coa normativa vixente.

4. Os organismos notificados participarán nas actividades de normalización pertinentes e nas actividades do grupo de coordinación dos organismos notificados, establecido conforme o artigo 26, ou aseguraranse de que o seu persoal de avaliación estea informado ao respecto, e aplicarán a modo de directrices xerais as decisións e os documentos administrativos que resulten das actividades do dito grupo.

Artigo 19. *Solicitud de notificación.*

1. Os organismos de control presentarán unha solicitude de notificación ante o órgano competente en seguridade industrial da comunidade autónoma en que cada organismo de control teña o seu domicilio social.

2. A solicitude irá acompañada dunha descrición:

a) Das actividades relativas á avaliación da conformidade, aos controis periódicos, intermedios e extraordinarios, e á reavaliación da conformidade;

b) Dos procedementos relativos ás actividades recollidas na letra a);

c) Dos equipamentos de presión transportables para os cales o organismo se considere competente;

d) Dun certificado de acreditación expedido pola Entidade Nacional de Acreditación, ENAC, que declare que o organismo de control cumpre os requisitos establecidos no artigo 18 deste real decreto.

3. Os órganos competentes das comunidades autónomas remitirán ao Ministerio de Industria, Turismo e Comercio copia da solicitude dos organismos de control que solicitasen ser notificados, indicando expresamente as tarefas para as cales fosen acreditados, para os efectos da súa difusión e eventual comunicación ás restantes administracións competentes, así como á Comisión Europea e aos outros Estados membros, logo da asignación dos correspondentes números de identificación por parte da Comisión Europea.

Artigo 20. *Procedemento de notificación.*

1. O Ministerio de Industria, Turismo e Comercio só poderá notificar a aqueles organismos que satisfagan os requisitos establecidos no artigo 18.

2. Este departamento notificarallos á Comisión e aos demais Estados membros, mediante o sistema electrónico desenvolvido e xestionado pola Comisión.

3. A notificación incluírá a información exixida no artigo 19, número 2.

4. O organismo en cuestión poderá realizar as actividades dun organismo notificado soamente se a Comisión ou os demais Estados membros non formulan ningunha obxección no prazo de dúas semanas tras a notificación.

Só un organismo así notificado será considerado organismo notificado para os efectos deste real decreto.

5. O Ministerio de Industria, Turismo e Comercio informará a Comisión e os demais Estados membros de todo cambio pertinente posterior á notificación.

6. Os servizos internos de control do solicitante, definidos no RID e ADR, non serán notificados.

Artigo 21. *Cambios na notificación.*

1. Se a Entidade Nacional de Acreditación, ENAC, comproba ou é informada de que un organismo notificado deixou de cumprir os requisitos establecidos no artigo 18 ou non está cumprindo as súas obrigas, restrinxirá, suspenderá ou retirará o certificado de acreditación a que se refire o artigo 19.2.d), segundo o caso, en función da gravidade do incumprimento de tales requisitos ou obrigas. Informará diso inmediatamente o órgano competente en materia de seguridade industrial da comunidade autónoma en que o organismo teña o seu domicilio social e o Ministerio de Industria, Turismo e Comercio, o cal facilitará a información á Comisión e aos demais Estados membros.

2. En caso de retirada, restrición ou suspensión da notificación ou se o organismo notificado cesou a súa actividade, o órgano competente en materia de seguridade industrial da comunidade autónoma en que o organismo teña o seu domicilio social adoptará as medidas oportunas para que os expedientes dese organismo sexan tratados por outro organismo notificado ou se poñan á disposición das autoridades de vixilancia do mercado responsables cando estas o soliciten.

3. O Ministerio de Industria, Turismo e Comercio deberá ser informado das medidas adoptadas nun prazo non superior a seis meses desde que se produza a retirada, restrición ou suspensión da notificación ou cesamento do organismo.

Artigo 22. *Cuestionamento da competencia de organismos notificados.*

1. A Comisión investigará todos os casos nos cales dubide ou lle presenten dúbidas de que un organismo notificado sexa competente ou siga cumprindo os requisitos e as responsabilidades que se lle exixen.

2. A comunidade autónoma en que o organismo en cuestión solicitou a súa notificación facilitará ao Ministerio de Industria, Turismo e Comercio, por petición deste, toda a información en que se fundamenta a notificación ou o mantemento da competencia do organismo en cuestión. O Ministerio de Industria, Turismo e Comercio remitirá a información recibida á Comisión.

3. As comunidades autónomas, o Ministerio de Industria, Turismo e Comercio, a Entidade Nacional de Acreditación e a Comisión garantirán o trato confidencial de toda a información sensible conseguida no transcurso das súas investigacións.

4. Cando a Comisión comprobe que un organismo notificado non cumpre ou deixou de cumprir os requisitos da súa notificación, informará o Ministerio de Industria, Turismo e Comercio ao respecto e pediralle que adopte as medidas correctoras necesarias, que poden consistir, se é necesario, na anulación da notificación.

Artigo 23. *Obrigas operativas dos organismos notificados.*

1. Os organismos notificados realizarán avaliacións da conformidade e controis periódicos, intermedios e extraordinarios conforme os termos da súa notificación e os procedementos establecidos no RID e ADR.

2. Os organismos notificados levarán a cabo reavaliacións da conformidade conforme o disposto no anexo II deste real decreto.

3. Os organismos notificados por un Estado membro estarán autorizados a traballar en todos os Estados membros. A autoridade notificante que efectuase a avaliación e notificación iniciais seguirá sendo responsable de supervisar as actividades en curso do organismo notificado.

Artigo 24. Obriga de información dos organismos notificados.

1. Os organismos notificados informarán o órgano competente en seguridade industrial da comunidade autónoma:

- a) De calquera denegación, restrición, suspensión ou retirada dun certificado;
- b) De calquera circunstancia que afecte o ámbito e as condicións de notificación;
- c) De calquera solicitude de información que recibisen das autoridades de vixilancia do mercado en relación coas actividades realizadas, salvo que a solicitude proveña do propio órgano competente en seguridade industrial da comunidade autónoma;
- d) Logo de solicitude, das actividades realizadas dentro do ámbito da súa notificación e de calquera outra actividade realizada, con inclusión das actividades e a subcontratación transfronteirizas.

2. Os órganos competentes das comunidades autónomas remitirán ao Ministerio de Industria, Turismo e Comercio copia da información do número anterior.

3. Cada organismo notificado proporcionará información pertinente sobre cuestións relacionadas con resultados negativos e, logo de solicitude, con resultados positivos da avaliación da conformidade, aos demais organismos notificados conforme este real decreto que realicen actividades de avaliación da conformidade e controis periódicos, intermedios e extraordinarios similares en relación cos mesmos equipamentos de presión transportables.

Artigo 25. Intercambio de experiencias.

O Ministerio de Industria, Turismo e Comercio é o departamento responsable de coordinar a representación do Reino de España ante a Comisión, para o intercambio de experiencias entre as autoridades nacionais dos Estados membros responsables, conforme este real decreto:

- a) Da política de notificación;
- b) Da vixilancia do mercado.

Artigo 26. Coordinación dos organismos notificados.

1. O Ministerio de Industria, Turismo e Comercio designará cada dous anos, segundo o procedemento recollido neste real decreto, un organismo notificado para que este represente o colectivo de organismos notificados nacionais ante o grupo de traballo que a Comisión poida constituír, co obxecto de instaurar e xestionar unha adecuada coordinación e cooperación entre os organismos notificados.

2. As comunidades autónomas, xunto co colectivo de organismos notificados, presentarán unha terna, da cal o Ministerio de Industria, Turismo e Comercio seleccionará o organismo notificado mencionado no parágrafo anterior.

3. O organismo notificado así seleccionado deberá transmitir ao resto de organismos notificados a orde do día das futuras reunións e as actas das reunións mantidas, así como calquera outro acordo ou información relevante que se produza durante as reunións.

4. Non obstante o anterior, calquera organismo notificado, a título individual, poderá formar parte do citado grupo de traballo.

CAPÍTULO V

Procedementos de salvagarda

Artigo 27. *Procedemento no caso de equipamentos de presión transportables que presentan un risco a nivel nacional.*

1. Cando as comunidades autónomas adopten medidas conforme o artigo 20 do Regulamento (CE) n.º 765/2008 do Parlamento Europeo e do Consello, do 9 de xullo, ou teñan motivos suficientes para pensar que un equipamento de presión transportable suxeito a este real decreto entraña algún risco para a saúde ou a seguridade das persoas ou noutros aspectos de protección do interese público recollidos neste real decreto, levarán a cabo unha avaliación relacionada co equipamento en cuestión atendendo a todos os requisitos establecidos neste real decreto. Os axentes económicos pertinentes cooperarán no necesario cos órganos competentes da comunidade autónoma en materia de industria, entre outras cousas permitindo o acceso aos seus locais e proporcionando mostras, segundo o caso.

Se no transcurso da avaliación, os órganos competentes da comunidade autónoma en materia de industria constatan que o equipamento de presión transportable non cumpre os requisitos establecidos no RID e ADR ou neste real decreto, pedirán sen demora ao axente económico correspondente que adopte as medidas correctoras adecuadas para poñelo en conformidade cos citados requisitos, retíralo do mercado ou recupéralo nun prazo de tempo razoable que elas mesmas sinalen, proporcional á natureza do risco.

Os órganos competentes da comunidade autónoma en materia de industria informarán diso o organismo notificado correspondente.

O artigo 21 do Regulamento (CE) n.º 765/2008, do Parlamento Europeo e do Consello, do 9 de xullo, será aplicable ás medidas correctoras a que se refire o parágrafo segundo deste número.

2. Cando os órganos competentes da comunidade autónoma en materia de industria consideren que o incumprimento non se limita ao territorio nacional, informarán o Ministerio de Industria, Turismo e Comercio, o cal transmitirá á Comisión e aos demais Estados membros os resultados da avaliación e as medidas que pediron que adopte o axente económico.

3. O axente económico asegurarse de que se adoptan todas as medidas correctoras pertinentes en relación cos equipamentos de presión transportables que comercializase no territorio nacional e no mercado da Unión Europea.

4. Se o axente económico en cuestión non adopta as medidas correctoras adecuadas no prazo de tempo indicado no número 1, parágrafo segundo, os órganos competentes da comunidade autónoma en materia de industria adoptarán todas as medidas provisionais adecuadas para prohibir ou restrinxir a comercialización do equipamento de presión transportable no mercado nacional, retíralo do mercado ou recupéralo.

Os órganos competentes da comunidade autónoma en materia de industria informarán o Ministerio de Industria, Turismo e Comercio, o cal transmitirá sen demora á Comisión e aos demais Estados membros tales medidas.

5. A información mencionada no número 4 incluírá todos os detalles dispoñibles, en particular os datos necesarios para a identificación do equipamento de presión transportable non conforme, a orixe do equipamento, a natureza da suposta non conformidade e do risco que presenta e a natureza e duración das medidas adoptadas, así como as razóns expresadas polo axente económico en cuestión. En particular, os órganos competentes da comunidade autónoma en materia de industria indicarán se a non conformidade se debe a un dos motivos seguintes:

a) O equipamento de presión transportable non cumpre os requisitos relacionados coa saúde ou a seguridade das persoas ou presenta outros aspectos de protección do interese público establecidos no RID e ADR e neste real decreto, ou

b) Carencias nas normas ou nos códigos técnicos a que se refiren o RID e ADR ou outras disposicións destes acordos.

6. Cando un procedemento se iniciase noutro Estado membro, as comunidades autónomas informarán sen demora o Ministerio de Industria, Turismo e Comercio de toda medida que adopten e de calquera dato adicional que teñan á súa disposición sobre a non conformidade do equipamento de presión transportable en cuestión. Este ministerio informará, de inmediato, a Comisión e os demais Estados membros destas medidas.

7. Se no prazo de dous meses tras a recepción da información indicada no número 4 ningún Estado membro nin a Comisión formulan ningunha obxección sobre unha medida provisional adoptada, a medida considerárase xustificada.

8. O Ministerio de Industria, Turismo e Comercio velará por que se adopten sen demora as medidas restritivas adecuadas respecto do equipamento de presión transportable de que se trate, tales como a retirada do equipamento do mercado.

9. O Ministerio de Industria, Turismo e Comercio é o órgano competente para recibir e transmitir ás comunidades autónomas toda aquela información a que se refire este capítulo procedente doutras comunidades autónomas, da Comisión ou doutros Estados membros.

Artigo 28. *Procedemento de salvagarda da Unión Europea.*

No caso de que o Ministerio de Industria, Turismo e Comercio reciba, por parte da Comisión ou dalgún outro Estado membro, unha comunicación en que se lle requira a retirada do mercado dun equipamento de presión transportable, froito dunha medida xustificada, o departamento ministerial citado dará traslado ás comunidades autónomas para que estas procedan á súa retirada do mercado, dando conta diso á Comisión.

Artigo 29. *Equipamento de presión transportable conforme que entraña algún risco para a saúde e a seguridade.*

1. Se tras efectuar unha avaliación conforme o artigo 27, número 1, unha comunidade autónoma comproba que un equipamento de presión transportable, aínda que conforme cos requisitos do RID e ADR e deste real decreto, entraña algún risco para a saúde ou a seguridade das persoas ou noutros aspectos de protección do interese público, pedirá ao axente económico en cuestión que adopte todas as medidas adecuadas para asegurarse de que o equipamento de que se trate xa non entrañe ningún risco cando se introduza no mercado, ou ben para retiralo do mercado ou recuperalo nun prazo de tempo razoable que el mesmo sinale, proporcional á natureza do risco.

2. O axente económico asegurárase de que se adopten as medidas correctoras necesarias en relación con todos os equipamentos de presión transportables afectados que comercializase ou que utilice en todo o territorio nacional, e en toda a Unión Europea.

3. A comunidade autónoma informará ao respecto inmediatamente o Ministerio de Industria, Turismo e Comercio, o cal remitirá a información á Comisión e aos demais Estados membros. A información facilitada incluírá todos os detalles dispoñibles, en particular, os datos necesarios para identificar o equipamento de presión transportable en cuestión e determinar a súa orixe e a cadea de subministración, a natureza do risco presentado e a natureza e duración das medidas nacionais adoptadas.

Artigo 30. *Incumprimento formal.*

1. Sen prexuízo do disposto no artigo 27, se unha comunidade autónoma constata unha das situacións indicadas a continuación, pedirá ao axente económico correspondente que emende o incumprimento en cuestión:

- a) Que a colocación da marcación Π vulnera os artigos 12, 13, 14 ou a disposición transitoria única;
- b) Que non se colocou a marcación Π;
- c) Que a documentación técnica non está dispoñible ou está incompleta;
- d) Que non se cumpriron os requisitos do RID e ADR e deste real decreto.

2. Se a falta de conformidade indicada no número 1 persiste, a comunidade autónoma en cuestión adoptará todas as medidas adecuadas para restrinxir ou prohibir a comercialización do equipamento de presión transportable, ou ben asegurarse de que se recupera ou se retira do mercado.

Disposición adicional primeira. *Recoñecemento da equivalencia.*

1. Os certificados de aprobación CEE de modelo aplicables aos equipamentos de presión transportables, expedidos de conformidade coa Orde do Ministerio de Industria e Enerxía do 3 de xullo de 1987, pola que se modifica a instrución técnica complementaria MIE-AP7 do Regulamento de aparellos de presión, referente a botellas e botellóns para gases comprimidos, licuados e disoltos de presión, e os certificados de exame CE de deseño, expedidos de conformidade co Real decreto 222/2001, do 2 de marzo, polo que se ditan as disposicións de aplicación da Directiva 1999/36/CE do Consello, do 29 de abril, relativa a equipamentos de presión transportables, recoñécense como equivalentes aos certificados de aprobación mencionados no RID e ADR e rexeranse polas disposicións relativas aos prazos de validez do recoñecemento dos certificados de aprobación establecidas nos ditos acordos internacionais.

2. Poderanse seguir utilizando as válvulas e os accesorios a que se refire o artigo 3, número 3, do Real decreto 222/2001, do 2 de marzo, e que leven a marcación establecida no Real decreto 769/1999, do 7 de maio, polo que se ditan as disposicións de aplicación da Directiva do Parlamento Europeo e do Consello 97/23/CE, relativa aos equipamentos de presión e se modifica o Real decreto 1244/1979, do 4 de abril, que aprobou o Regulamento de aparellos de presión, conforme o artigo 3, número 4, do referido Real decreto 222/2001, do 2 de marzo.

Disposición adicional segunda. *Inspeccións periódicas.*

1. Os controis periódicos, intermedios e extraordinarios dos equipamentos de presión transportables recollidos no ámbito de aplicación deste real decreto realizaranse nos prazos e nas condicións que se establecen no RID e ADR.

2. O propietario, o seu representante establecido na Unión Europea ou o usuario, gardarán o certificado correspondente e a documentación que se xere ata, como mínimo, o seguinte control periódico. Tanto o certificado como a documentación xerada estarán á disposición das autoridades de vixilancia do mercado.

Disposición adicional terceira. *Comunicación de actuacións.*

Os organismos notificados, como organismos de control, están obrigados a comunicar as súas actuacións anualmente, en aplicación do artigo 48.2 a) do Real decreto 2200/1995, do 28 de decembro, ao órgano competente en materia de industria da comunidade autónoma onde as realizaron.

Disposición adicional cuarta. *Competencias do Ministerio de Defensa.*

As competencias administrativas en relación cos equipamentos de presión transportables afectos aos servizos da Defensa Nacional corresponden ás autoridades do Ministerio de Defensa, sen prexuízo da asistencia que estas poidan solicitar das diferentes administracións públicas.

Disposición transitoria única. *Reevaluación da conformidade.*

A conformidade dos equipamentos de presión transportables a que se refire o artigo 1, número 2, letra c), fabricados e postos en funcionamento antes da data de aplicación do Real decreto 769/1999, do 7 de maio, será acreditada conforme o procedemento de reevaluación da conformidade que figura no anexo II deste real decreto.

Disposición derogatoria única. *Derrogación.*

Queda derogado o Real decreto 222/2001, do 2 de marzo, polo que se ditan as disposicións de aplicación da Directiva 1999/36/CE do Consello, do 29 de abril, relativa a equipamentos de presión transportables, sen prexuízo do establecido na disposición adicional primeira respecto aos certificados de aprobación CEE de modelo aplicables aos equipamentos de presión transportables, expedidos de conformidade coa Orde do Ministerio de Industria e Enerxía do 3 de xullo de 1987, aos certificados de exame CE de deseño, expedidos de conformidade co Real decreto 222/2001, do 2 de marzo, e respecto á utilización das válvulas e os accesorios a que se refire o artigo 3, número 3, do Real decreto 222/2001, do 2 de marzo, e que leven a marcación conforme o que se dispón no artigo 3, número 4, do mesmo real decreto.

Disposición derradeira primeira. *Modificación do Real decreto 2060/2008, do 12 de decembro, polo que se aproba o Regulamento de equipamentos de presión e as súas instrucións técnicas complementarias.*

Engádeselle unha nova disposición adicional sexta ao Real decreto 2060/2008, do 12 de decembro, coa seguinte redacción:

«Disposición adicional sexta. *Competencias do Ministerio de Defensa.*

As competencias administrativas en relación cos equipamentos de presión afectos aos servizos da Defensa Nacional corresponden ás autoridades do Ministerio de Defensa, sen prexuízo da asistencia que estas poidan solicitar das diferentes administracións públicas.»

Disposición derradeira segunda. *Título competencial.*

Este real decreto dítase ao abeiro da competencia estatal sobre bases e coordinación da planificación xeral da actividade económica, prevista polo artigo 149.1.13.^a da Constitución.

Disposición derradeira terceira. *Habilitación normativa.*

Autorízase o ministro de Industria, Turismo e Comercio, dentro do ámbito das súas competencias, para ditar as normas de desenvolvemento deste real decreto, así como a adaptación do contido dos seus anexos ao progreso científico e tecnolóxico.

Disposición final cuarta. *Entrada en vigor.*

1. Este real decreto entrará en vigor o día seguinte ao da súa publicación no «Boletín Oficial del Estado».
2. Porén, a entrada en vigor do establecido para recipientes de presión, as súas válvulas e demais accesorios utilizados para o transporte de ONU n.º 1745, ONU n.º 1746 e ONU n.º 2495 producirase o 1 de xullo de 2013.
3. Así mesmo, o disposto no artigo 19.2.d) entrará en vigor o 1 de xaneiro de 2012.

Dado en Madrid o 14 de outubro de 2011.

JUAN CARLOS R.

ANEXO I

Lista de mercadorías perigosas distintas das da clase 2

Número ONU	Clase	Substancia perigosa
1051	6.1	Cianuro de hidróxeno estabilizado con menos do 3 % de auga.
1052	8	Fluoruro de hidróxeno anhidro.
1745	5.1	Pentafluoruro de bromo, excluído o transporte en cisternas.
1746	5.1	Trifluoruro de bromo, excluído o transporte en cisternas.
1790	8	Ácido fluorhídrico, con máis do 85 % de fluoruro de hidróxeno.
2495	5.1	Pentafluoruro de iodo, excluído o transporte en cisternas.

ANEXO II

Procedemento aplicable á reavaliación da conformidade

1. Para garantir que os equipamentos de presión transportables a que se refire o artigo 1, número 2, letra c), fabricados e postos en servizo antes da data de aplicación do Real decreto 222/2001, do 2 de marzo, cumpren aquelas disposicións pertinentes do RID e ADR e deste real decreto que sexan aplicables no momento da reavaliación, aplicarase o método establecido neste anexo.

2. O propietario ou o usuario deberá pór á disposición dun organismo notificado que se axuste á norma UNE-EN ISO/IEC 17020:2004 tipo A, notificado para a reavaliación da conformidade, os datos relativos aos equipamentos de presión transportables que permitan a este organismo identificalos con exactitude (orixe, normas aplicadas en materia de deseño e, no que se refire ás bombonas de acetileno, tamén as indicacións referentes ao material poroso). A información deberá incluír, de ser o caso, as limitacións de utilización prescritas e as notas relativas aos posibles danos ou ás reparacións que se efectuasen.

3. O organismo notificado de tipo A, notificado para a reavaliación da conformidade, deberá avaliar se os equipamentos de presión transportables presentan polo menos a mesma seguridade que os equipamentos de presión transportables recollidos no RID e ADR. A avaliación deberase efectuar sobre a base dos datos presentados a teor do disposto no número 2 e, de ser o caso, dos controis adicionais.

4. Se os resultados das avaliacións a que se refire o número 3 son satisfactorios, o equipamento de presión transportable someterase aos controis periódicos previstos no RID e ADR. Cando se cumpran os requisitos deses controis periódicos, o organismo notificado responsable dos controis periódicos colocará a marcación Π, de conformidade co artigo 13, números 1 a 5, ou supervisará a súa colocación. A marcación Π irá seguida do número de identificación do organismo notificado responsable dos controis periódicos. O organismo notificado responsable dos controis periódicos expedirá un certificado de reavaliación conforme o número 6.

5. Cando os recipientes de presión se fabricasen en serie, autorízase que a reavaliación da conformidade relativa a cada un dos recipientes, incluídos as súas válvulas e demais accesorios utilizados para o transporte, sexa efectuada por un organismo notificado para os controis periódicos dos recipientes de presión transportables pertinentes, sempre que a conformidade de tipo fose avaliada, conforme o número 3, por un organismo notificado de tipo A, responsable da reavaliación da conformidade, e se expida un certificado de reavaliación de tipo. A marcación Π irá seguida do número de identificación do organismo notificado responsable dos controis periódicos.

6. En todos os casos, o organismo notificado responsable dos controis periódicos expedirá o certificado de reavaliación, que conterá como mínimo:

- a) O número de identificación do organismo notificado que expide o certificado e, cando sexa diferente, o número de identificación do organismo notificado de tipo A responsable da reavaliación da conformidade conforme o número 3;
- b) O nome e o enderezo do propietario ou usuario mencionados no número 2;
- c) En caso de aplicación do procedemento previsto no número 5, os datos que identifiquen o certificado de reavaliación de tipo;
- d) Os datos de identificación do equipamento de presión transportable en que se colocou a marcación Π, incluídos polo menos o número ou números de serie, e
- e) A data de expedición.

7. Expedirase un certificado de reavaliación de tipo.

Cando se aplique o procedemento previsto no número 5, o organismo de tipo A, responsable da reavaliación da conformidade, expedirá o certificado de reavaliación de tipo, que conterá como mínimo:

- a) O número de identificación do organismo notificado que expida o certificado;
- b) O nome e o enderezo do fabricante e do titular da homologación orixinal do equipamento de presión transportable cando o titular non sexa o fabricante;
- c) Os datos de identificación do equipamento de presión transportable pertencente á serie;
- d) A data de expedición, e
- e) A seguinte indicación: este certificado non autoriza a fabricación de equipamentos de presión transportables ou partes deles.

8. Coa colocación da marcación Π, o propietario ou usuario indica que asume a responsabilidade da conformidade do equipamento de presión transportable con todos os requisitos aplicables establecidos no RID e ADR e neste real decreto, tal como se apliquen no momento da reavaliación.